



03.06.2010

UKA2010/50

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiupparput:

Suliffeqarfinni tamani pilerisaarutit taamatuttaaq atuisunut allakkat suulluunniit nassiunneqartartut pinngitsooratik aamma kalaallisut allagartaqartalernissaat pillugit Naalakkersuisut siunnersuuteqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Malik Berthelsen, Siumut)

Tungavilersuut:

Nuna tummaarisarput tassaavoq Kalaallit Nunaat. Soorunami nuna kalaallisut oqaluffiusoq sullitallu kalaallisut oqaasillit ulluinnarni oqaatsit atugaannik aamma sullinneqarnissaat pissusissamisoorpoq.

Takornartaanngilaq, minnerunngitsumik maani Nuummi, suliffeqarfiit namminersortunit pigineqartut piseqqusaarutiminnik qallunaatuinnaq allagartalersuisarnerat. Tamannalu taamaattussaannartut ukiorpassuannngulersuni innuttaasunit politikerinillu isigineqartarsimavoq.

Nuukuge Avis qupperaanni aqqusinermiluunniit pisulluni pisiniarfiit igalaavanni silataanniluunniit piseqqusaarutit kalaallisut allagartallit qaqutiguiinnaq naammattuugassaasarput. Aali nunami kalaallisut oqaluffiusumi.

Suliffeqarfinit soorlu makkuninnga, aningaaserivinnit, sillimmasiisarfinnit, naatsorsuuserisunit, inatsisilerituunit kiisalu sanaartoornernik suliaqartunit sullinneqarnermi tamatigorluinnaq allakkat nassiunneqartartut tassaasarput qallunaatuinnaq allassimasut.

Qulaani suliffeqarfiit taasannit atuisunut pisisartunullu pingaaruteqartorujussuuvoq sullinneqarnermi tamakkiisumik paasinninnissaq.

Assersuutigalugu sunaagaluarnersumik sillimmaseraanni (forsikring) atuisoq qallunaatut oqalussinnaanngikkuni sillimmasiinerup sunik imaqarneranik tamakkiisumik isumaqatigiissutimi imaa paasiinnaanngilaa, nassuiaatit qallunaatuinnaq allassimasarneri pissutigalugit. Taamatuttaarlu aningaaserivinnit millionilikkaanilluunniit atoraluaraanni isumaqatigiissutit aammaasiit qallunaatuinnaq allassimasut atsiorneqartarput. Aningaasarpasuarnik atorneq tassaasarpoq inuunermi aningaaserivimmu pituttornertut taaneqarsinnaasoq. Taamaattumik atuisoq kalaallisuinnaq oqaluppat pinngitsoorani isumaqatigiissut kalaallisut allassimasariaqartoq isumaqarpunga.

Qallunaat oqaasi Kalaallit oqaasiinik “atoruminarneruni”, naanneruni imaluunniit suliffeqarfinni tamakkunani kalaallisut oqaasillit amigaataaneri utoqqatsissutigiinnarlugit qaqugorsuarmut taamaattuaannartussatut ingerlaannarsinnaanngilagut. Tassami suliffeqarfiit sullitamik aningaasarsiorfiginiarunikkit taava sullitamik oqaatsit kissaatigisaat paasisinnaasaallu atorlugit aamma sullissisariaqarput.

Savalimmiormiut Islandimiullu oqaatsiminnik pingaartitsillutik sumi tamaani namminneq oqaatsiminnik atuinerat assorujussuaq takullugit nuannaartunarput. Savalimmiormiut Islandimiullu taamaassinnaappata aamma neriunaraluaqaaq nunatsinni taamaasinissatsinnut Inatsisartut suliap aallartinnissaanut tapersiiumaartut.

Soorlumi Naalakkersuisut Siulittaasuata Namminersornerup eqqunneqarnerani ilaatigut imaq oqalugiartoq, “oqaatsigut sutigut tamatigut kimittunerusumik atorneqalernissaat sulissutigissavarput, imaangilaq aatsaat persuarsionartumik oqalugialeraangatta oqaatsitta pisortatigoortuunerat eqqaasassagipput”.